

Nehemías

Persia'su na'su Artajerjes anttesi Nehemíasja omboe toequi Jerusaléni ja governadorove dapa. Tise tsa'caen mandasi Judándeccu tsu canqqe'su patu ttuccuma ccase ñoñamba ccutssian'fa. Ttuccuma nanimba aindeccu avuja'fa.

Nehemías israendeccone iñajan'cho

1 ¹Va tsu Hacialías dutssi'ye Nehemías condase'cho. Artajerjes na'suve dapa canqqe'fa veinteve manda'je'ni, tsa Quisleu ccovuni gi ña, Nehemíasja, Susa canqqeni can'jen. ²Ña tsa'caen can'jen'ni tsu ña antian Hananijan, Judáne ji'cho tsandiendecui'ccu ñani can'su ji'fa. Tsonsi gi Jerusaléne toya'caen tsa'su aindeccu tseni catiyepa Babiloniani jimbindequiane'qqe iñajampaña. ³Iñajampañasi tsu qqen condase'fa: “Tsa patsuyepa ccuyapa can'jen'chondeccuja ñoa'me aiyepave dapa vana'jen'fa. Nane Jerusalénma patu ttuccuja pa'cco tsu asittaye'cho. Toya'caen tsa'su sombo'ttima picco'je'choma'qqe tsu pa'ccoma si'ngei'ccu oque cati'cho.”

⁴Tsama pañamba gi i'namba ñombi'yepa ambe'yi asettupa sefani canjen'su Chigama iñajamba qqen su: ⁵“Ñoa'me dyo'tssia Na'su sefacconi canjen'su Chiga, majan que manda'choma pañamba tson'sui'ccu, toya'caen majan queve in'jan'chondeccui'ccu tsangae injancco'su; ⁶Chigáne, ña, a'ta toya'caen cose'qqe quema shondo'su israendeccone quema iñajan'choma pañamba tsa'caen tsonjan. Atesu gi ingi israendeccu gi quenga egae tsincon'fa. Nane ñoa'me ña'su aindeccu, toya'caen ña'qqe gi tsa'caen egae tsincon. ⁷Quenejan ñoa'me barembi'choa've gi tson'fa. Nane que mandasi quema shondo'su Moisés tsa manda'cho toya'caen se'pi'choma afasi ingija pañambipa que suquua'caen tson'fambi. ⁸In'jan gi que Moisésnga qqen su'choma: ‘Que'i egae tsincon'ninda gi pa'cco andenga asi'ttaen moeña. ⁹Tsa'ma tsa'caen asi'ttaen japa ccase ñame in'jamba, ña manda'choma tson'fa'ninda gi mapán ande shaca'choni canjen'fa'ni'qqe ccase Jerusaléni iya. Tsa Jerusalén tsu ñoa'me ña in'jamba isu'cho ande.’

¹⁰“Ingita gi quema shondosundeccu, toya'caen gi que aindeccu, toya'caen que tisu oshacho'choi'ccu ccushaen'cho aindeccu. ¹¹Chigáne Na'su, ña quema iñajansi, toya'caen quema shondosundeccu iñajansi, pañamba tsa'caen

tsonjan. Nane avujatsse gi quema ñotsse afa'je'fa. Toya'caen ña na'suni japa ñañajansi tise ma in'jaenjan cuintsu ñame in'jamba ña ñañajan'choma afeye.”

Nehemías Jerusaléni jaye antte'cho

2 Nane ñajan na'su Artajerjesnga vinoma cuiña'su gi. ¹Na'su manda'je'cho veinte canquue'fave nepisi tsa Nisán ccovuni gi fae a'ta tisenga cui'ñañe vinoma isi tsu na'suja ña ñombi'ye'je'choma atte. ²Attepa tsu qquen ñañajampaña:

—¿Mingae dapa qui ñombi'ye'je'chove attian? Pajimbi'ma aqquia tisu vana'jen'chone tsa'caen da'chove gi atte.

Tsa'caen susi gi dyopa injama'choni ttun'dundujeve dapa ³na'suma chigambiamba qquen su:

—Ti'tsse canseja Ti'tsse'tssia. ¿Ma'caen gi ñombi'ye'je'chove attiambi'ya tsa ingi yayandeccu'ye ccui'fa'cho canquema metsse tsomba toya'caen tise sombo'ttima metsse oque cati'fa'ninda?

Ña tsa'caen susi tsu na'suja su:

⁴—¿Ma'caen gi quenga tsoña?

Tsa'caen susi gi injama'choi'ccu sefacconi'su Chigama ñañajamba ⁵qquen na'sunga su:

—Que Ti'tsse'tssia ñame in'jan'da, toya'caen ña ja'ño ñañajan'cho ñotssisi in'jan'da, chigáne ñama manda moejan Judá andeni, ña yayandeccu'ye ccui'fa'cho canqueni, ña japa ccase tsesuve ñoñañe.

⁶Na'suja tise pushei'ccu pporotsse dyaipa qquen ñama ñañajampaña:

—¿Mañi ccovu tsu que jaya'cho? ¿Minga'ni qui ccase jiya?

Tsonsi mañi ccovuve ña japa jiya'choma tisenga condasi tiseja antte ña jaya'chove. ⁷Toya'caen gi tise ma ñañajan tise in'jan'da tevaen'jema ñanga afeye ña Eufrates na'ema chiga amppi'jefa'su gobernadorondeccunga afeye cuintsu se'pimbe'yi ñama antte'faye pashamba Judáni jaye.

⁸Toya'caen gi faesu tevaen'jeme ñañajan na'sumbe tsampima coira'su Asafnga afeye cuintsu tsaja osha'cho quini'ccoma ñanga afeye. Afesi mesave somboemba Chiga etti pporotsse'su sundaro etti'su sombo'ttima toya'caen ttuccu'su sombo'ttima'qqe ccase ñoñamba ña tsa'ove'qqe tsao'ñañe. Ña tsa'caen ñañajansi tsu Na'su, ña Chiga, ñama ñotsse fuitesi na'su Artajerjesja osha'cho ña ñañajan'choma ñanga afe.

¹¹Osefa'poe gi Jerusaléni nepi. Tseni tres a'ta can'jemba gi ¹²cose jangipa majan faesu tsandindeccui'ccu canquema can'su ja. Nane toya majangayi'qqe condambi gi Na'su Chiga ñama in'jaensi Jerusalénma ma'caen tsoña'choma. Ñajan boronga otsepa jasi ñai'ccu fae'ngae jacansundeccuja tsu'ttengae tsuipa ja'fa. ¹³Tsequi cose Sinjunccu'su sombo'tti'ye sombopa Vatova tsa'ccu sombo'jengae pashamba Cati'je'cho sombo'ttinga nepi. Nepipa gi Jerusalén canquue'su patu ttuccuma atte'fa tayo amppi sheque'choma, toya'caen canquue'su sombo'ttima tayo

oque'fa'choma. ¹⁴Tsomba Tsa'ccu sombo'je'cho sombo'ttinga japa na'su tsa'ccu ccutsian'chonga nepipa shanda. Nane ña boro panshañe oshambisi gi shanda. ¹⁵Toya cose'yi gi sinjuncu shaca'chopi japa pa'tssima ñotsse cambia shandapa Sinjuncu'su sombo'tti'ye Jerusalén ca'ni'fa.

¹⁶Nane governadorondeccuja atesu'fambi tsu ña cose jacan'cho ni ña ma'caen tson'choma. Toya'caen gi Judá'su aindeccu, jai'ngae semaña'chondeccu, tsa Chigama afasundeccu, nasundeccu, governadorondeccu cca'indeccunga'qqe toya condambi ña tsoñe in'jan'choma. ¹⁷Tsa'camba gi ja'ño tise'panga su:

—Que'i in'janquia'caen ingija ñotsse can'jen'fambi. Nane Jerusalén canque'su patu ttuccu amppi shequepa sombo'tti'qqe tayo oque'cho. ¡Chigáñe ñama fuite'faja! ¡Jinge fae'ngae semamba Jerusalén canque'su ttuccuma ccase ccutsiañe cuintu cca'indeccu ingima afase'choma antte'faye!

¹⁸Tse'i ñajan tise'panga conda ma'caen Chiga ñama ñotsse fuitesi na'su Artajerjes ñama ñotsse afa'choma. Condasesi tsu su'fa:

—¡Tsa'caenjan jinge ccase ttuccuma ccutsian'faye!

Tsa'caen in'jamba tisupapora ñotsse in'janccopa ashaen'fa. ¹⁹Tsa'ma Sanbalat, tsa horón a'i, Tobías, tsa amonita na'suma shondo'su, toya'caen Gesem, tsa árabe a'i, ingi tsoña'choma pañamba ingima feñamba afasepa su'fa:

—¿Micon qquen qui tson'jen'fa? ¿Isha qui na'su Artajerjes'ye somboye in'jamba tson'jen'faya?

²⁰Tsa'ma ñajan qquen su:

—Na'su, Sefaconi'su Chiga tsu ingima fuiteya. Ingija, tisema shondosundeccuyi gi canque'su ttuccuma ccase ccutsian'faya. Nane que'ija ca'ni'faya'bi qui ingi'ccu semañe.

Enemigondeccu noñangian'cho

4 ⁶Semamba ttuccuma ccutsian'fa enttinge sefa'suve. Poiyi'cco a'i tsu avujatse sema'jen'fa. ⁷Tsa'ma Sanbalat, Tobías, árabesundeccu, amonitandeccu toya'caen Asdod aindeccu tsa'caen sema'jen'fa'choma pañamba iyicca'yefa. Nane semamba ttuccuma ccutsiamba enttinge sefa'suve tayo angapa, changoma picco'je'fa'choma pañamba iyicca'yepa ⁸condasecco'fa ma'caen Jerusaléndeccuma iyiccopa ingi aindeccuma qqueñaña'chove. ⁹Tsa'ma ingija ingi Chigama in'ajamba coira'su sundarondeccuma ccutsian'fa cuintu pa'cco a'ta, pa'cco cose tise'pa'ye coiraye.

Ttuccuma nani'fa'cho

6 ¹⁵Elul ccovu, a'ta veinte y cinconi tsu ttuccuma nani'fa. Nane pa'cco sema'cho tsu cincuenta y dos a'ta. ¹⁶Ingima iyicayesundeccu toya'caen faesu pporotssia andeni canjen'su aindeccu'qqe tayo nani'choma pañamba ñoa'me dyo'fa. Toya'caen tsu tise'pa injama'choni patsuyepa can'jen'fa, ingi Chiga ingima fuitesi ttuccuma nani'fa qquen pañamba.

Nanimba toequi japa can'jen'fa'cho

7 ⁷³Tsa'caen nanimba poi israendeccu toequi tisupa canqqueni japa can'jen'fa. Nane Chigama afasundeccu, levítandeccu, sombo'ttima coirasundeccu, settapoensundeccu, Chiga ettima semasundeccu toya'caen cca'indeccu tsa'caen cca'tti cca'tti japa can'jen'fa.

Na'su Chiga manda'choma afa'cho

8 Nane septimo ccovu nepisi poi'yi'cco israendeccu tsu tisupa canqqueni can'jen'fa. ¹Tsa'caen can'jen'fa'ni mandasi poi'yi'cco ccase bo'fa Jerusaléni'su Tsa'ccu sombo'tti isevetssia'su atandundunga. Tseni bopa Chiga Aya'fama atesian'su Esdrasma su'fa cuintsu Moisés manda'cho tevaen'jema somboeñe, tsa Na'su Chiga Israel aindecunga afe'cho manda'choma.

¹⁸Tsa'caen bopa siete a'tave fiestaemba Na'su Chigama avujatsse afa'fa. Nane poi a'ta tsu Esdrasja Chiga tevaen'jen manda'choma cambia aindecunga condase'je. Octavo a'ta nepisi manda'cho mandaquua'caen ccase bopa tisupa injama'choni Chigama ñotsse in'jamba tisema iñajan'fa.

Egae tsincon'choma condase'cho

9 ¹Omboe, tsa ccovu'su a'ta veinte y cuatroqui, poi israendeccu ccase bo'fa. Bopa ambe'yi tisupa egae tsincon'chone ñombi'ye'choma canjaeñe in'jamba tsincco'cco'je'cco'a sarupa ondiccujema ondiccupa ande ccuttopa'sima tisu tsovenga ganga'fa. ²Tsomba faesu andesundeccu'ye joqqitssipa ccutsu'fa tisupa egae tsincon'choma toya'caen tise'pa tayopi'su coenzandeccu egae tsincon'choma'qqe Chiganga condaseye. ³Nane tsa'caen ccutsupa tsu tres horave paña'fa Na'su tise'pa Chiga manda'cho tevaen'jema afa'choma. Pañamba faesu tres horave tsu tisupa egae tsincon'choma Na'su Chiganga condasepa tisema ñotsse afa'fa.